

皇朝詞林典故

卷十九  
之二十

PL  
2548  
C55  
1887  
v.11

LIBRARY  
MAR 24 1975  
UNIVERSITY OF TORONTO







皇朝詞林典故卷十九

官制

保送御史

康熙二十九年四月。揀選編修檢討。  
爲科道官。馮雲驕。湯右曾。改給事中。  
彭始搏。宋朝楠。劉灝。張瑗。改監察御  
史。



謹案

國初庶常散館間改科道以編修檢討  
改者自馮雲驪六人始。

四十四年四月定制編檢改御史無  
庸試俸。

謹案向例試俸一年始得實授至是  
以翰林班在科道之上停試俸例。



是年六月。吏部議定。考選科道。將翰林院編修檢討及正途出身之六部司員。一同開列。恭候簡用。

謹按滿洲蒙古編檢。例不考選御史。其餘皆得保送。

雍正三年三月。



諭大學士等。應開列科道人員。俱係科甲出身。再考文字。亦屬無益。今次著於翰林各部院衙門。應行開列人員內。令各堂官薦舉。從前朕於科道中。欲用外省道員。故將有才幹者。選用。今外省道員。將次用足。科道職司言路。務擇忠誠爲國。直言無隱者。方爲稱職。如錢廷獻之徒。務虛名。劉燦之



挾讐爲已。崔致遠之抗違狂妄。此數人。皆  
但知有身。而不顧朝廷。如此存私之人。斷  
不宜於言責。今次薦舉人員內。若有此等  
行爲。必將原保舉之人。一併究問。  
乾隆三年三月。  
諭科道爲朝廷耳目之司。關係甚重。向來俱  
係各部院堂官。將合例司員揀選保送。翰



林院編修檢討。亦在揀選保送之列。由吏部帶領引見。朕親加簡拔。用爲科道。此定例也。但思部院司員及翰林編檢人數甚多。各堂官保送。皆就伊等所見舉出。統計一衙門官員。不過十之一二。其餘衆員。朕未經徧覽。此中或有可任科道而不在保送之例者。亦未可定。朕意欲將例應考選



翰林部屬等官一概通行引見。司員每日  
在本衙門辦事。其才品之長短賢否。該堂  
官皆所熟悉。著逐名出具考語。有由州縣  
行取補用者。亦著註明。卽著該堂官帶領  
引見。至編檢官員。職司文墨。其辦事之能  
否。未經試驗。無庸出具考語。著該掌院學  
士帶領引見。朕自有鑒別。現在御史員缺。



應行考選。且記名之人。即可備將來考選之用。至於考選人員。著各衙門於圓明園該班奏事之日。帶領引見翰林院編檢人多。分作三班。部院酌量人數分班。每班以二三十人爲率。記名之後。陸續交與吏部。俟有御史缺出。按其品級俸次。開列引見。候旨補授。補用將完之日。吏部再將如何。



考選之處。另行請旨。

三十八年閏三月。吏部議覆御史唐  
淮奏。編修檢討。俟歷俸已滿三年之  
後。始得保送御史。從之。

六十年十一月。

諭各衙門保送滿漢御史。初次引見。未經記  
名。下次不得再行保送。著爲令。



嘉慶二年十月奉

旨。吏部奏現在記名御史之部屬尙有八員。翰林祇有一員。應請考選等語。向來御史缺出。吏部帶領一排三人。翰林前列。以致多用。現在部屬人員不少。而翰林祇有一員。若再將翰林保送部屬未免壅積偏枯。所有未用之翰林一員著



暫停引見。俟部屬僅餘二三員時。再將翰林部屬。一同照例引見。

六年十一月。掌院學士達椿彭元瑞奏准。編檢保送御史。仍照舊例。部屬記名者無人。卽保送部屬。翰林記名者無人。卽保送翰林。陸續分班。不相遲待。



十年六月。

諭。據給事中永祚奏。漢御史缺出。請將翰林部屬輪班簡用一摺。向來漢御史缺出。吏部將翰林一員。部屬二員。帶領引見。朕隨時酌核人材。量加錄用。豈能記憶前次所用係屬何項人員。該給事中。所奏。尙爲平允。著准照所請。嗣後遇有



漢御史缺出。吏部將曾經記名以御史用之翰林部屬各員。輪班帶領引見。候朕簡用。

散館

國初庶吉士散館。除授內三院編檢外。改授科道數人。

順治十六年散館。仍留教習者十餘



人。外用者一人。黜革者一人。十八年散館。則有部用者十餘人。嗣是歷科參用其制。或用中書行人。評事。博士。或以知縣卽用。或歸進士原班銓選。或用教職。法爲加備焉。

謹按庶吉士改授科道。歷科散館皆有之。至康熙三十六年丁丑。惟吳甫



生江球二人。自是而下。遂停其改授。  
雍正元年十月。

諭朕特恩開科。人才輩出。將來選拔庶常。朕  
當親加考試。至日後散館。仍照舊例。以三  
等分用。

是年定制。滿洲庶吉士散館。文理優  
者。授編修檢討。平常者。照滿洲散進。



士例。以通政使司知事等官補用。

謹按滿洲庶吉士。雍正甲辰科散館。  
有改用小京官者一人。丁未科以後。  
仍復改用主事之例。

是年十一月。

諭內閣。今科庶吉士散館。滿漢試卷。著吏部  
尙書隆科多。戶部尙書張廷玉。禮部尙書



張伯行禮部侍郎。登德閱看具奏。從前已將庶吉士內揀選分用。此內或更有才堪外任。及可在部員者。爾等會同左都御史朱軾分別具奏。

乾隆十三年五月

諭。歷科進士。殿試一甲第一名。卽授爲修撰。二名三名授爲編修。至散館時無所更易。



伊等恃已授職。遂自甘怠忽。學業轉荒。卽如今年散館。修撰錢維城。考列清書三等。編修莊存與。考列漢書二等之末。其不留心學問。已可概見。但錢維城。係派清書。或尙非其素習。著再試以漢書。候朕閱定。莊存與。不准授爲編修。俟引見時。朕酌量其人才。或以部屬。或以知縣。或歸班選用。則



此後一甲之人。皆有所警而專心學問。若有仍三等者。其例視此。

謹按錢維城於散館後。再試五言八韻排律詩一首。莊存與引

見。奉

旨留館教習。同次科庶常。再行散館。二人俱未改用。



又按鼎甲散館改用者。康熙辛丑科  
編修吳文煥。改員外郎。乾隆丁未科  
編修孫星衍。董教增。癸丑科編修陳  
雲。乙卯科編修潘世璜。俱改主事。歷  
科以來。五人而已。

三十四年四月。

諭。御史孟邵條奏。請定翰林院編檢額缺一



摺所見不知事理。向來所以不限定額者。因庶吉士散館之後。編檢人員。自不較多。中間遇有陞降。其數亦無壅滯之患。卽如該御史所奏。定以額缺。而所餘各員。仍令額外學習候補。是有限制之名。而無限制之實。

嘉慶六年四月。



諭。昨日引見散館人員。除一甲進士三名。  
先經授職外。其清漢書庶吉士內。留館  
授職者二十員。用爲部屬者三十五員。  
用爲知縣者十五員。因思各部額外候  
補主事。爲數較多。此次以部屬用各員。  
得缺需時。且現在滿洲及邊省翰林人  
數甚少。所有散館二甲進士內。以部屬



知縣用之。吳其彥。張惠言。陳壽祺。李翊。吳榮光。花杰。李端。李象鵠。王鼎。楊世英。胡大成。俱著加恩。改授編修。三甲進士。以部屬用之。貴慶著加恩。授爲檢討。

十年四月。奉

旨。嗣後散館引見。照新進士引見之例。按依省分排敘。並於各員名下。註明等第。



名次。

謹按庶常教習三年散館授職。定制也。然亦有未散館而授職者。歷科如順治間之宋德宜。崔蔚林。康熙間之沈宗敬。勵廷儀。汪灝。蔣廷錫。查慎行。梅穀成。雍正間之黃之雋。張泰基。蔣溥。鹿邁祖。朱鳳英。佟保。孫人龍。陳中。



薛馥。李賢經。色通額。乾隆間之劉起振。朱璣。梁啟心。張若澄。汪如藻。恭泰。祝塋。或以供奉。

內廷。或以宣諭外省。或以校書議敘。或以告假逾期。皆得免其考試。而乾隆已未。鼎甲涂逢震。由編修充上江宣諭化導使。未散館。卽陞中允。尤爲逾。



格彙錄於此。用誌庶常之疊邀殊數云。

館選

順治三年定制。殿試畢。新進士由內三院題請選庶吉士。屆期。

上御便殿。內院學士。豫以新進士名單進呈。

次第引



見恭候

欽選。分清漢書。

謹按自專設翰林院後。禮部以新進士。移送到院。掌院學士會同大學士。以新進士開列引。

見恭候

欽定。其以他途用者。移送吏部。館選者。學士

一員。朝服至署宣

旨。

九年七月。給事中高辛允奏准。按直  
省大小。選漢庶吉士。直隸江南浙江  
各五人。江西福建湖廣山東河南各  
四人。山西陝西各二人。廣東一人。二  
十人習清書。二十人習漢書。滿洲四



人。蒙古二人。漢軍四人。一體讀書。

謹按庶常。

國初隸內弘文院。本無定員。自是年後。  
歷科因地因才。遞有增減。詳見題名  
卷中。

又按是年壬辰科。授滿洲一甲進士  
麻勒吉。爲修撰。折庫納。巴海。爲編修。

並選滿洲蒙古漢軍二甲三甲進士  
爲庶吉士。十二年己未科。停漢軍進  
士館選。十五年停滿洲蒙古漢軍考  
試之例。康熙九年庚戌。復開科館選。  
十八年停考試之例。三十年辛未。復  
開科館選。自後歷科皆預選焉。

雍正元年十一月。



諭內閣。編檢庶常。乃清要之選。必須學問優長。人品端方。始爲稱職。若品行有虧。雖文藝可觀。亦無足取。今歲所中進士。爾等悉心察訪。必得文行兼優之士。擢爲庶吉士。將來始可以收得人之效。其第一甲第一名于振。著卽授修撰。第二名戴瀚。第三名楊炳。卽授編修。二甲第一名張廷珩。卽授

檢討。

謹按定制。一甲進士榜下授職。二甲三甲館選者。散館授職。是科二甲一名張廷珩。卽授檢討。雍正十一年二甲一名張若靄。卽授編修。皆未經選庶吉士。真曠典也。

又按歷科二甲進士授檢討者。張廷



珩而外。康熙間則有錢金甫。乾隆間  
則有陳兆崙。夏之容。周長發。三甲授  
編修者。康熙間則有李鎧。錢中諧。曹  
禾。乾隆間則有董泰。或

召試詞科。或

特旨拔用。故皆未依甲第。其以一人而迭爲  
修撰。編修與編修檢討者。已見內擢

中。

是月又

諭大學士等。新科進士於引見之前。朕欲先行考試。知其學問。再行引見。選拔庶人才。不致遺漏。一應仍照殿試預備。考試題目。朕將詩文四六各體出題。視其所能。或一篇。或二三篇。或各體俱作。悉聽其便。



是月又

諭新科進士著問九卿有知其居家孝友人  
品端方者各就所知舉出毋得隱而不言  
親戚相識亦不必迴避問明卽注於進士  
姓名之下一併奏聞

是月又

諭選庶吉士著照依文字入選有保舉無保

舉名次引見。其文字不入選。與無保舉者。仍照殿試甲第引見。

是年十二月。

諭。昨引見新科進士。有記名者十七人。年力尚壯。傳問伊等。有願在各館効力。及在內官學學習者。令各自陳明。若行走勤慎。學問好者。朕仍拔置翰林。



謹按此項人員。至三年四月。授景山  
教習。夏之芳。爲編修。姜穎新。黃岳牧。  
陸宗楷。爲檢討。雖未著爲令。亦掌故  
之足徵者。

三年四月。

諭大學士九卿等。前日李鍾戡奏稱。翰林爲  
儲材重地。自康熙四十五年至六十年。七

科每省俱有庶吉士。雍正元年癸卯科。漢軍及河南。四川。進士。無館選者。雍正二年甲辰科。蒙古及山西。河南。陝西。四川。廣東。湖南。廣西。雲南。貴州。進士。俱無館選者。請廣儲材之路等語。朕卽位之後。以培養人材。最重翰林。故加意詳慎。隆科多曾奏稱。聖祖時館選。每省俱有庶吉士。所以朕於雍



正元年癸卯科館選時。試其文藝。觀其人  
品。於僻遠省分之人。亦酌量選取。又每諭  
教習之臣。盡心訓迪。迨後。歷經揀擇。及考  
試文章。其中惟江浙人文義實較各省爲  
優。因將各省人員。分用於內外各衙門。而  
江浙人留館獨多。雍正二年甲辰科館選。  
亦詳加考試。朕因以文義優者。選爲庶吉

士。於是山西河南等省進士。遂多不得與選。蓋翰林職司文章。若以文義不及者處之。則用違其材。而其人或有他長。反無以自見矣。朕凡於用人行政。無不審慎籌畫。務求當理。而選擇翰林。更爲留意。實欲使人人勿枉其才。各効所長。庶國家得收器使之效。豈計及於各省翰林之多寡有無。



也。今覽李鍾義所奏。是必外人有此議論。故以入告朕甚嘉之。嗣後館選庶吉士。或應考試文藝選取。或應每省額選幾人。或應分爲南北兩院。向來教習止派滿漢各一員。今若按省分各選庶吉士。或亦按省分各設教習可乎。至各省未得館選之進士中。或有文義可充翰林之選者。爾等確

有所知。卽行舉出。毋使人有逸才之論。尋  
議。厯科館選之法。盡善盡美。更無遺  
逸之才。李鍾弢條奏。無庸議。從之。

五年五月。

諭內閣。今科選拔庶常。應如何簡選考試。務  
得人材以濟實用。爾等會議具奏。尋議。請  
照雍正元年癸卯科。殿試後集諸進



士於

保和殿考試。仍令九卿確行保舉其考  
試擬用論詔奏議詩四題。或作一二  
篇。或諸體全構。聽其各展所長。屆期  
欽點大臣閱卷進呈。其新進士內如有彼此  
熟悉。素爲衆所推服者。亦令公同舉  
出。

謹按先是進士殿試畢。卽待館選。自  
順治丙戌迄康熙辛丑皆然。至是乃  
定朝考之制。其試題。惟乾隆十六年。  
特改用論。奏。議。詩。賦。各一篇。後仍如  
前例。

乾隆二年四月。

諭。新科進士。著總理事務王大臣驗看。分別。



三等具奏。候朕親加簡選。

十六年閏五月。

諭庶吉士分習清書。例由翰林院掌院學士分派。惟量其年力。不拘省分。舊時清漢各半。自雍正年間以來。分習清書者漸少。每科尙有十四五員。十七八員不等。朕思邊省之人。館選本少。聲律亦素所未嫻。旣習

國書自必專意殫精。惟清文是務。非天分  
優而學業勤者。不能兼顧。漢文益致日就  
荒落。迨散館時。或以清書優等授職。而留  
館後。遇通行考試。往往拙於詩賦。列入下  
等。改令別用。究其所肄清文。自散館一試  
外。別無職分應用之處。微獨邊省。卽北五  
省。庶吉士類然。翰苑中江浙人員較多。而



遠省或致竟無一人。非所以均教育而廣儲才也。嗣後雲南。貴州。四川。廣東。廣西等省。庶吉士。不必令習清書。直隸。山東。河南。山西。陝西等省。亦視其人數在三四員以上。酌派年力少壯者一二員。其江浙等省。人數在五六員以上者。酌派二三員。率以三十歲以下者充之。每科通計在十人內。

外。寧缺無濫。循舉舊章。備國朝典制足矣。  
該衙門卽遵諭行。

二十五年五月。大學士傅恒奏准。新  
進士朝考。在

保和殿考試。閱卷之大臣。卽於

文華殿兩廊住宿。並派御史四員。於監  
察考試後。監看閱卷。



謹案朝考。在

文華殿閱卷。乾隆五十二年丁未。奉

旨派閱卷大臣。在

圓明園閱卷。以後俱在

圓明園。惟嘉慶四年。在

文華殿。

三十一年四月。

諭。向來新進士殿試朝考後。復派王大臣驗看。分別等第。原因人文並重。且使邊方遠省。名次在後者。亦得均與館選也。但思進士原係通行引見。其人之可造與否。朕皆臨時甄別錄用。自可毋庸預爲揀選。嗣後新進士引見時。著令按省分。仍依甲第前後。分班帶領。并將上次每省錄用人數。詳



晰開單呈覽。如有朝考錄取者。并於綠頭籤及排單內註明其如何分省分日引見之處。該衙門臨時酌辦奏聞。

三十一年五月大學士傅恒等奏准

### 新進士引

見。除一甲三名。業經授職。另爲一班外。其滿洲蒙古漢軍。及各省新進士。按其省

分。並甲第前後。開寫排單。其有朝考  
入選者。除於排單及綠頭籤註明。並  
將此項人員。歸於各該省之前。仍按  
甲第名次引  
見。

三十四年五月。大學士尹繼善等奏  
准。新進士有朝考入選者。於排單綠



頭籤註明。仍照各該省甲第名次引見。

四十年五月奉

旨。嗣後鼎甲試卷內。如有失粘落韻以及字畫差訛之處。俱著一體加簽。

謹按定制。一甲進士朝考試卷。另行進呈。不歸閱卷大臣定擬。至是始加

簽。仍不列以名次。惟乾隆五十四年

已酉科朝考。

特命將一甲進士胡長齡。汪廷珍。劉鳳誥。三

卷與衆卷一體彌封。歸閱卷大臣定

擬。胡長齡名在第三。汪廷珍名在第

二。劉鳳誥名在第五。後仍如前例。

嘉慶七年壬戌。選宗室果齊斯歡。德



朋阿。惠端。爲庶吉士。

謹按

國初定制。宗室不應科目之選。乾隆十年乙丑科會試。選宗室達麟圖爲庶吉士。十三年戊辰科選平泰。良誠。爲庶吉士。旋停宗室考試。嘉慶四年。特恩定宗室鄉會試例。至是選果齊斯歡。

等三人一時稱盛焉。

皇朝詞林典故卷十九



皇朝詞林典故卷二十

官制

請假

順治十六年四月。掌院學士折庫納。  
王熙。奏准。翰林院官。自侍讀學士以  
至編檢。與掌院俱爲同官。原無統屬。  
凡給假省親。終養。遷葬。告病等項。令

其自行陳請。

康熙十四年定制。翰林請假。惟掌院學士自行陳奏。其餘均送吏部具題。

五十三年二月。

諭大學士等。近見翰林等官。告假者甚多。三分已去其二。又庶吉士等。正當學習時。遽回本籍。至三年考試將近。又來考試。似此



任意告假。焉得學習。此後除丁憂終養外。  
凡翰林院庶吉士告假者。應照致仕知縣  
例。不准補用。

謹按此項休致人員。至雍正四年九  
月。恭逢。

恩詔。俱得開復。

乾隆三十四年四月。

諭。御史孟邵條奏所稱編檢聽其去來。不足以昭慎重等語。不知伊等遇有告假等事。資俸例應扣除。不能越次遷轉。倘其間有以領俸前後。巧爲趨避者。自有定例。本難趨避。卽間有一二見小不惜顏面之徒。亦將爲士林所不齒。國家又何必屑屑爲之防禁耶。



謹按四五品以下京官告假。其因各項事故。及程途遠近。俱分別定有限期。翰詹並無專條。茲不具載。

候補

乾隆三十六年十月。

諭。向來翰林院侍讀。侍講。學士。及侍讀。侍講。中允。贊善等官。有需次候補者。例坐補原

官不得通融借補。此等詞曹清秩。額缺有數。一經回籍。至來京應補時。輒格於成例。未免守候需時。因思讀之與講。繫銜雖殊。品秩相等。而漢中允贊善。亦非若滿員之銓用殊途。分別五六品頂帶者可比。從前坐補之例。未免過於拘泥。卽稍爲變通。於體制亦無妨礙。嗣後此等候缺人員。讀講



中贊。准其各自通融補用。著爲令。

謹按是年定通融借補例內。並無洗馬司業。至三十七年。候補洗馬劉權之。復蒙

恩准其借補侍講。三十八年。候補司業劉亨地。亦蒙

恩准其借補中贊。

嘉慶四年五月。吏部議定。侍讀學士。侍讀缺出。如有候補侍讀學士。侍讀將現任應轉人員。通行開列於候補人員之後。并議定中允贊善品級。既分正從。且一係開列具題。一係引見。未便通融借補。

謹按向例。侍讀學士。侍讀缺出。俱以



現任應轉之員。論俸指擬轉補。如有  
候補人員。無論原任係讀係講。祇開  
列指擬轉補者。所遺侍講學士。侍講  
之缺。而列於應陞人員之前。至是更  
正。

又按定制。翰詹凡有銷假。丁憂服闋  
者。補官後。扣除告假丁憂日期。仍論

前俸陞轉。俸同者論資。

九年十一月。奉

旨。向來候補三品以下京堂翰詹等官。應  
行赴部驗到者。均止在部投遞名帖。並  
不親身到部。嗣和珅管理吏部。酌定章  
程。令此項人員赴部具呈驗到。本非通  
行定例。今候補侍講李傳熊。既係六月



賁文到京。祇因投文時遺漏名帖。尙無大錯。此次侍講員缺。著准其一體開列。仍著補具名帖存案。嗣後三品以下京堂翰詹等官。應行赴部投到者。仍照向例。將文書名帖。一同送部。著該部纂入則例。

改用部曹

雍正元年三月。吏部奏。本衙門員外郎缺員。請將翰林院庶吉士。揀選引見補用。從之。

謹按庶常散館。有改用各部主事之例。翰林大考。間亦改用郎中以下等官。其不由散館大考改用者。自是年始。



二年十二月。

諭刑部刑名案件。最爲緊要。朕所賴者。諸大臣之贊襄。諸大臣所賴以辦事者。各司員之盡職。是以每司必得一二實心辦事才能之員。方有裨益。朕思翰林院滿漢編修檢討庶吉士。俱係進士出身。伊等卽未必素諳律例。亦必不難於練習。爾等於滿漢

編修檢討庶吉士內揀選。或有情願在刑部學習辦事者。或有爲爾等所知者。共揀選二三十員。帶領引見。分在各司學習辦事。如有辦事明白。實心効力者。酌量題補。

改授館職

國朝崇尚文治。館制修明。自歷科新進士選除外。復徵試詞科。暨保舉經學。



俱膺館職事載

恩遇卷中。其由他官改授者。如錢以塏。  
以左通政授少詹事。趙殿最以按察  
使授少詹事。揆敘以二等侍衛授侍  
讀。康五瑞以給事中授侍讀。張允欽  
陸錫熊俱以郎中授侍讀。王士禎以  
郎中授侍講。高士奇以中書授侍講。

王原祁。以給事中授中允。方苞。以會  
試中式舉人授中允。王延年。以國子  
監學正授司業。曹洛禔。以舉人授司  
業。黃鉞。以主事授贊善。孫士毅。以巡  
撫授編修。杜鎮。陳聶恒。程晉芳。以主  
事授編修。勵杜訥。以州同授編修。魏  
學誠。陳厚耀。俱以中書授編修。趙申



季以知縣授編修。尼滿以筆帖式授編修。王懋竑以教授授編修。夏之芳以教習授編修。周有德以貢生授編修。王繼文。靳輔。劉兆麒。張長庚。俱以官學生授編修。陳學海以御史授檢討。陸宗楷。姜穎新。黃岳牧。俱以教習授檢討。廖必琦以主事改庶吉士。侍

朝以國子監監丞改庶吉士。王崇簡。  
杜芳。周爰訪。張丕吉。魏天賞。喬庭桂。  
岳映斗。俱以前明進士特選庶吉士。  
邵晉涵。余集。周永年。張能照。胡榮。朱  
鈐。吳紹燦。楊昌霖。程嘉謨。俱以進士  
補選庶吉士。以上諸人入館先後以  
及爵里。皆分注於題名。茲惟以改授



時品秩爲序。志其遭際之榮。仰見  
盛世詞垣收材之廣焉。

謹按翰林稱清華之秩。庶吉士一自  
散館改用他官。卽不得復入翰林。惟  
張逸少以庶常散館改知縣。遷秦州  
知州。伊父大學士張玉書奏乞內用。  
復得授爲編修。其在滿員內班較少。

不免借材外班。然亦不得復爲編修  
檢討。惟達椿以庶常改部。旋從外班  
補侍講。大考降爲檢討。轉預內班之  
選。故改授館職。尤以編檢爲榮云。  
又按僧格勒勝格俱以科甲出身。從  
部屬補外班翰林。大考降爲編修。亦  
外班中所希覩者。



又按翰林已改御史而復入詞館者。  
康熙三十九年彭始搏以會試分房。  
持正不阿。仍授檢討。翰林出爲外任。  
而復入詞館者。乾隆四十年。山西布  
政使朱珪。

特召來京。授侍講學士。嘉慶九年。廣東按察  
使邱庭澐。陳請終養。

特旨授侍讀學士。皆殊數也。

又按內閣學士爲翰詹應陞之缺。此外京堂必曾任編檢者。得入另單開列。惟乾隆間尹壯圖。張若淳。嘉慶間王汝璧。皆非曾任編檢之員。得授內閣學士。蓋由

特簡云。



又按康熙間。唐孫華以吏部主事在翰林院行走。乾隆三十七年。陳孝泳以通政司副使入直。

南書房。嘉慶四年。趙秉冲。以內閣侍讀學士入直。

南書房。三人皆未膺館職。而遭際有異於人者。故附於此。

兼銜

康熙十年正月。令提督四譯館太常寺少卿關防內。增鑄翰林院銜。

雍正四年十二月。改直省學道爲學院。凡部曹奉差督學。加翰林院銜。二甲者加編修。三甲者加檢討。受代後。仍還本任。



會典開載。

翰林院正官。

滿掌院學士一員。漢掌院學士一

員。從二品。

滿侍讀學士二員。漢侍

讀學士三員。滿侍講學士二員。

漢侍講學士三員。從四品。

滿侍讀二

員。漢侍讀三員。滿侍講二員

漢侍講三員。從五品。

史官

修撰無定員。從六品。

編修無定員。正七

品。

檢討無定員。從七品。

庶吉士無

定員。支七品俸。誥封仍依甲第視編修檢討。

首領官。

滿典簿一員。漢典簿一員。從八品。



滿孔目一員。從九品。

漢孔目一員。未入

流。

屬官。

滿待詔二員。漢待詔二員。從九品。

滿筆帖式四十員。漢軍筆帖式四

員。由舉人貢生除者七品。生員監生除者八品。官學生除者九品。

五經博士二十七員。正八品。

謹按我

朝五經博士。孔顏曾孟四姓外。其閔氏。

冉氏。顓孫氏。有氏。仲氏。言氏。卜氏。端

木氏。姬氏。東野氏。與漢關氏。唐韓氏。

宋周氏。程氏。張氏。邵氏。朱氏。皆有之。

崇儒重道之典。視前代爲加渥矣。

起居注館。



滿日講起居注官十員。漢日講起

居注官十二員。

兼銜

滿主事二員。

漢主事一員。

正六品。

滿筆帖式十四

員。漢軍筆帖式二員。

品級與翰林院同

文淵閣。

領閣事二員。

提舉閣事一員。直

閣事四員。

校理十二員。

檢閱六

員。兼銜。

詹事府

順治元年。置詹事府。以少詹事一人

掌府事。

是年十一月

詔裁府署職掌統於內三院。

九年四月。復置詹事府。設詹事一員。



少詹事二員。主簿一員。錄事二員。通事舍人二員。置左右春坊設庶子各一員。諭德各一員。中允各二員。贊善各二員。司經局設洗馬一員。正字二員。俱令內三院官兼之。時以府署止設漢員。因專設滿詹事一員。掌管府事。而司其印信。

十五年五月。裁詹事府。

康熙十四年十一月。奉

詔復置詹事府。設滿漢詹事各一員。兼翰林院侍讀學士。少詹事各二員。兼侍講學士。左右春坊庶子各二員。兼侍讀侍講。諭德各二員。兼修撰。左右中允各四員。兼編修。贊善各四員。兼檢討。



司經局洗馬各一員。亦兼修撰。主簿各一員。錄事各二員。正字各二員。

三十一年十月。

特命禮部尚書湯斌兼掌詹事府事。

謹按詹事向設專員。自是年後。皆以尚書侍郎兼領。至三十六年。復用專員。

三十七年十二月。裁滿少詹事一員。

諭德中允贊善各二員。正字錄事各

二員。

三十八年七月裁漢中允贊善各一員。正字錄事各一員。

五十二年閏五月。裁漢諭德一員。中

允贊善各一員。錄事一員。



乾隆十三年四月。裁漢少詹事一員。  
十四年正月。

諭詹事府衙門事務簡少。其庶子等官俱設  
有左右員缺。惟左諭德滿漢二缺。有左無  
右。於官制殊未畫一。所有左春坊左諭德  
滿漢員缺。著裁去。其現任滿漢二員。著該  
部照例以應補之缺。奏請補用。

三十八年三月。裁漢正字一員。

五十四年十二月。

諭。本日閱洗馬周瓊。呈請代奏謝恩摺內。有補授司經局洗馬。兼翰林院修撰字樣。修撰係一甲一名進士專銜。何用假借兼攝。因思詹事府衙門。自詹事庶子中允贊善等官。亦俱兼翰林院讀講學士侍讀侍講。



編修檢討等銜。此係相沿前明舊例。詹事等官。既各有專銜。嗣後毋庸再兼翰林院虛銜。以昭覈實。

嘉慶二年四月。

諭詹事府各員京察。向歸翰林院掌院辦理。而該衙門事務。又係該堂官自行。未歸畫一。原辦未免疎漏。所有詹事府衙

門事務。嗣後均著翰林院掌院管理。

謹按詹事府京察。原係詹事辦理。乾

隆五十六年。御史五泰奏。歸掌院學

士。見翰林院京察卷中。

五年十一月。

諭。從前和珅管理翰林院掌院時。將詹事

府衙門奏明。歸入翰林院衙門兼管。究



非體制。嗣後詹事府京察。及一切應辦事宜。仍著照舊例辦理。翰林院掌院不必兼管。

會典開載。

詹事府正官。

滿詹事一員。

漢詹事一員。

正三品。

滿少詹事一員。

漢少詹事一員。

正四

品。

首領官。

滿主簿一員。

漢主簿一員。從七品。

左春坊。

滿左庶子一員。

正五品。用四品頂帶。

漢左庶

子一員。正五品。

滿左中允一員。正六品。用

五品

頂戴。

漢左中允一員。正六品。

滿左



贊善一員。漢左贊善一員。從六品。

右春坊。

滿右庶子一員。正五品用。四品頂帶。漢右庶

子一員。正五品。滿右中允一員。正六品。用。

五品頂帶。漢右中允一員。正六品。滿右

贊善一員。漢右贊善一員。從六品。

司經局。



滿洗馬一員。漢洗馬一員。從五品。

府坊局滿筆帖式六員。品級與翰林院同。

皇朝詞林典故卷二十







